


## *Penzionisani profesori Fakulteta islamskih nauka*



### **Prof. Sana'a Al-Adly-Vejzagić, lektorica za arapski jezik**

Sana'a Al-Adly Vejzagić (Aleksandrija, 1946.) je na Fakultetu islamskih nauka bila angažovana na poziciji lektora za arapski jezik, u periodu od 1979. do 2011. godine, kada je i penzionisana. Fakultetsku diplomu stekla je na Univerzitetu El-Azhar u Kairu. Osim na Fakultetu, držala je predavanja iz arapskog jezika i u Gazi Husrev-begovoj medresi. Za potrebe izvođenja lektorskih vježbi napisala je udžbenik *Arapski jezik: konverzacija*. Objavila je nekoliko tekstova u *Zborniku radova FIN-a*. Ona je prva žena predavač na Fakultetu islamskih nauka.



### **Prof. dr. Hilmo Neimarlija**

Hilmo Neimarlija (Ričica kod Kaknja, 1950.) radio je kao docent na Katedri za islamsku filozofiju na Fakultetu islamskih nauka u Sarajevu od 1977. do 1992. te od 2002. do 2015. Od 2002. do 2011. bio je angažovan kao vanjski saradnik. Svršenik je Fakulteta političkih nauka u Sarajevu. Magistarski rad pod naslovom *Protivurječnosti u Špenglerovoj filozofiji povijesti* odbranio je na Filozofskom fakultetu u Sarajevu 1985. Doktorsku disertaciju pod naslovom *Morfologija svjetske povijesti Osvalda Špenglera* odbranio je na istom fakultetu 2002. godine. Uređivao je *Takvim* i izdanja Udruženja ilmijje. Obavljao je dužnost glavnog i odgovornog urednika Izdavačke djelatnosti Islamske zajednice u BiH. Bio je urednik *Preporoda*. U dva mandata je bio poslanik u Predstavničkom domu Parlamentarne Skupštine BiH te dva mandata delegat u Domu naroda Parlamentarne Skupštine BiH. Dva puta je biran za predsjednika Sabora Islamske zajednice u BiH. Koautor je nacrtu važećeg Ustava Islamske zajednice u BiH. Bio je član Inicijativnog odbora i Glavnog odbora Kulturnog društva *Preporod* te Izvršnog odbora Stranke demokratske akcije, predsjednik Fondacije *Popis 2013* i predsjednik Upravnog odbora Fakulteta islamskih nauka te Upravnog odbora Vijeća Kongresa bošnjačkih intelektualaca.



### **Prof. dr. Ismet Bušatlić**

Ismet Bušatlić (Zastinje kod D. Vakufa, 1948) je bio vanredni profesor na Katedri za islamsku civilizaciju u periodu od 1997. do 2015. godine kada je i penzionisan u zvanju vanrednog profesora. Obavljao je dužnost prodekana za nastavu (2001-2005) i dekana (2007-2015). Diplomirao je na Islamskom teološkom fakultetu u Sarajevu. Magistrirao je i doktorirao na Filološkom fakultetu Univerziteta *Complutense* u Madridu 2000., disertacijom pod naslovom *Andaluzijska djela poznata u Bosni i njihov utjecaj na vjerski i intelektualni život (Obras andalusies conocidas en Bosnia e influyentes en su desarrollo*

*religioso e intelectual*). Autor je dvije monografije: *Studije o sljedbenicima knjige* (2009) te *Kraljevski grad pod sultanima: Jajce 1528-1878* (2011). Prije dolaska na Fakultet islamskih nauka radio je kao imam i vjerskoprosvjetni referent u Trebinju, kao kustos Muzejske zbirke u Gazi Husrev-begovoj biblioteci te kao glavni i odgovorni urednik *Islamske misli* i časopisa *Elif* u Podgorici. Član je redakcije časopisa *Anali Gazi Husrev-begove biblioteke*, *Novi muallim*, *Al-Hikma* te časopisa *Godišnjak BKZ Preporod*.<sup>1</sup>




### **Prof. dr. Jusuf Ramić, emeritus**

Jusuf Ramić (Šeher, Kalesija kod Tuzle, 1938.) je bio angažovan kao redovni profesor na Fakultetu islamskih nauka, a penzionisan je u zvanju emeritusa. Osnovno obrazovanje je završio u rodnome mjestu, a Gazi Husrevbegovu medresu u Sarajevu 1958. godine. Studirao je pravo u Ljubljani i Beogradu. U Kairu je 1962. godine upisao Fakultet arapskog jezika na Univerzitetu El-Azhar. Na ovom Fakultetu je diplomirao, magistrirao i doktorirao. Doktorska disertacija pod nazivom *Usretu 'l-Muvailihi ve eseruha fi 'l-edebi 'l-'arebi* (*Porodica Muvailihi i njen utjecaj u književnosti*) štampana je u Kairu 1980. godine. Prije odlaska na studij u Kairo bio je imam glavne džamije u Čajniču. Po povratku u Bosnu i Hercegovinu 1974. godine počeo je raditi u Islamskoj zajednici, prvo kao šef Kabineta reisul-uleme, a onda je 1977. godine postavljen za docenta na predmetu arapski jezik i arapska književnost na Islamskom teološkom fakultetu u Sarajevu. U Gazi Husrev-begovoj biblioteci je radio kao direktor (1982.-1986.) a u Medresi kao profesor arapskog jezika. Godine 1983. biran je u vandrednog, a 1989. u redovnog profesora. U ovom periodu biran je za prodekana, a 1990. godine i za dekana Fakulteta. U njegovom mandatu Ministarstvo nauke, kulture i fizičke kulture R BiH aktom od 5. 12. 1991. godine verificiralo je Fakultet kao visoku obrazovnu instituciju.

---

<sup>1</sup> Detaljniji biobibliografski podaci o prof. dr. Bušatliću dostupni su na sljedećem linku:  
<https://1library.co/document/ydkov91q-prof-dr-ismet-bu%C5%A1atli%C4%87.html>




### **Prof. dr. Murat Dizdarević**

Murat Dizdarević (Bistrica kod Bijelog Polja, 1943) je bio vanredni profesor na predmetu Engleski jezik. Na Fakultetu islamskih nauka u Sarajevu radio je od 1999. do 2013. Godine kada je i penzionisan u spomenutom zvanju. Svršenik je Filozofskog fakulteta u Prištini. Magistarski rad pod naslovom *Fosterova romaneskna teorija i praksa* odbranio je na Filozofskom fakultetu Sveučilišta u Zagrebu 1980. godine. Doktorsku disertaciju pod naslovom *Engleski roman 18. i 19. vijeka u kritici na srpskohrvatskom jeziku* odbranio je na Filološkom fakultetu u Prištini 1990. Predavao je Engleski jezik na Univerzitetu u Prištini i Univerzitetu u Sarajevu. Bio je prodekan za nastavno-naučni rad na Saobraćajnom fakultetu Univerziteta u Sarajevu i član Suda časti Univerziteta u Sarajevu. Od 1994. do 1999. bio je u diplomatskoj službi Bosne i Hercegovine, od čega četiri godine kao savjetnik u Ambasadi BiH u Londonu. Objavio je više naučnih i stručnih radova iz oblasti anglistike i književne historije. Bavi se i prevodjenjem.



### **Prof. Azra Saračević**

Azra Saračević (Bihać, 1936) je bila predavač na predmetu Engleski jezik. Na Fakultetu islamskih nauka radila je od 1984. do 2009. godine. Završila je studij engleskog i francuskog jezika na Filozofskom fakultetu Univerziteta u Sarajevu. Bavila se prevodilačkom djelatnošću, usmenom pismenom. Učestvovala je u prevodjenju *Eseja od Bosne: tri bosanske enklave*, na engleski jezik, izdatom u Sarajevu 1999. godine. Naslov prijevoda je glasio *Essays (on behalf) of Bosnia*.



## **Akademik Rešid Hafizović, emeritus**

Rešid Hafizović (Potočari kod Srebrenice, 1956.) penzionisan je kao redovni profesor Fakulteta islamskih nauka. Osnovno obrazovanje završio je u Srebrenici, a srednje u Sarajevu. Godine 1981. diplomirao je teologiju na Islamskom teološkom fakultetu (sada Fakultetu islamskih nauka) u Sarajevu i iste godine na istoimenom Fakultetu izabran za asistenta na katedri za Islamsku dogmatiku, Sufizam i Uporedne religije. Završio je postdiplomski studij na Katoličkom bogoslovnom fakultetu u Zagrebu 1989.

Godine 1990. boravio je na jednogodišnjoj specijalizaciji u Parizu na Institute catholique pri Sorboni. Godine 1993. odbranio je doktorsku disertaciju (*Ibn 'Arabijevo filozofsko-teološko učenje o Logosu*) na Filozofskom fakultetu u Sarajevu. Izabran je u članstvo Kongresa Bošnjačkih intelektualaca 1994. godine. Naredne godine je proveo jedan semestar na Oxford Center for Islamic Studies u Oxfordu. Bio je angažovan kao redovni profesor na predmetima Islamska dogmatika, sufizam, teološka epistemologija i uporedne religije. Godine 2006. primljen je u članstvo Iranske akademije znanosti, a 2023. u članstvo Akademije nauka i umjetnosti Bosne i Hercegovine.




## **Akademik Enes Karić, emeritus**

Enes Karić (Višnjevo, Travnik 1958.) je penzionisan u zvanju redovnog profesora tefsira na Fakultetu islamskih nauka. Nakon završene osnovne škole i Gazi Husrev-begove medrese, upisuje Fakultet islamskih nauka i Fakultet političkih nauka u Sarajevu. Postdiplomski studij upisuje na Filozofskom fakultetu i magistrira 1986. godine. Doktorirao je na Filološkom fakultetu Univerziteta u Beogradu 1989. godine, na temu *Hermeneutički problemi prevođenja Kur'āna na*

*srpskohrvatski jezik*. Time je stekao zvanje doktora filoloških nauka. Specijalizaciju je obavljao na sljedećim univerzitetima: Univerzitet Al-Azhar (1983.), Kairski univerzitet (1983.), Univerzitet Yale (1990-1991.) ,Univerzitet Oxford (1996.) ,Univerzitet u Santa Barbari, Fullbright program (UCBS) – (2002). Aktivni je član Kraljevske akademije nauka «Aalu l-Bayt» u Ammanu, Jordan kao i član savjeta mnogih domaćih i međunarodnih naučnih časopisa. Bio je ministar za obrazovanje, nauku, kulturu i sport u Vladi Federacije Bosne i Hercegovine 2002.-

2003., gostujući profesor na Univerzitetu u Ljubljani, Republika Slovenija, predsjednik Upravnog odbora Filozofskog fakulteta u Sarajevu 2003.-2008. U dva navrata bio član Etičkog komiteta na Kliničkom Univerzitetском Centru u Sarajevu 2005. godine. 2003.-2007. Bio je i dekan našeg Fakulteta. Penzionisan je u zvanju redovnog profesora.



### **Prof. dr. Orhan Bajrektarević, emeritus**

Orhan Bajrektarević je rođen u Špionici, Srebreniku, 29. maja 1956. godine gdje je završio osnovnu školu. Gazi Husrevbegovu medresu, petogodišnji program i Filozofski fakultet (filozofija i sociologija) završio je u Sarajevu. Boravio na studijskom usavršavanju ispred Republičkog Zavoda za međunarodnu razmjenu – oblast, islamska filozofija i arapski jezik – na Univerzitetu u Kairu u Egiptu (1986-1988). Postdiplomske studije pohađao u Sarajevu, Kairu i Zagrebu.

Magisterij, Filozofski fakultet u Sarajevu, Teza: Ibn Rušd i problem destrukcije filozofije kod Gazalija (Dva filozofsko-polemička spisa unutar arapsko-islamske srednjovjekovne filozofije), odbranjena 22. maja 1998. godine. Doktorat, Fakultet islamskih nauka u Sarajevu, Teza: Uticaj Ibn Rušda na razvoj moderne arapskoislamske filozofije, odbranjena 7. jula 2011. godine. Bio glavni urednik islamskih informativnih novina „Preporod“ (1991-1992.), a zatim, asistent na nastavnim predmetima “Islamska filozofija“ i „Tesavuf“ na Islamskom teološkom fakultetu u Sarajevu (1988-1998), viši asistent na nastavnim predmetima “Islamska filozofija I i II, Islamska filozofija sa tesavufom” na Islamskom teološkom u Sarajevu (1998 -2002.), predavač na predmetima Islamska filozofija I i II, Islamska filozofija sa tesavufom (2003-2011. god. na Fakultetu islamskih nauka u Sarajevu, docent na predmetima Islamska filozofija, Kasična islamska filozofija, Savremena islamska filozofija, Islamska filozofija sa tesavufom, Filozofija etike/Ahlak, na Fakultetu islamskih nauka u Sarajevu (2012-2016) godine, te vanredni profesor na istim ili neznatno modifikovanim predmetima 2016-2021. Orhan Bajrektarević je penzionisan kao redovni profesor Fakulteta islamskih nauka Univerziteta u Sarajevu.



## **Prof. dr. Nusret Isanović**

Nusret Isanović (Gradačac, 1954) radio je kao redovni profesor na Katedri za islamsku filozofiju na Fakultetu islamskih nauka u Sarajevu od 2017. do 2022. Od 1993. do 2017. bio je angažovan kao univerzitetski nastavnik na Islamskom pedagoškom fakultetu Univerziteta u Zenici (Islamska pedagoška akademija). U periodu od 1993. do 2002. godine bio je dekan Islamske pedagoške akademije u Zenici. Godine 1979. diplomirao je filozofiju i sociologiju na Filozofskom fakultetu u Sarajevu. Na istom fakultetu odbranio je magistarski rad pod naslovom *Metafizičke i kulturno-civilizacijske pretpostavke islamske umjetnosti* 2000. god. Doktorsku disertaciju u oblasti islamske filozofije pod naslovom *Osobnost islamske umjetnosti i njen izraz u arhitekturi i kaligrafiji* odbranio je na Fakultetu islamskih nauka 2006. god. Dr. Nusret Isanović bio je urednik Islamskih informativnih novina *Preporod*, Časopisa *Islamska misao*, Izdavačkog centra Rijaseta IZ-e u BiH - *El-Kalem*, Zbornika radova Islamskog pedagoškog fakulteta u Zenici, Zbornika radova Fakulteta islamskih nauka u Sarajevu. Objavio je više djela, te naučnih i stručnih radova iz oblasti iz oblasti filozofije, islamske umjetnosti i teorije odgoja i obrazovanja.

## **Prof. dr. Džemal Latić**



Prof. dr. Džemal Latić rođen je u Pridvorcima kod Gornjeg Vakufa 1957. g. Završio je Gazi Husrev-begovu medresu u Sarajevu, zatim Fakultet islamskih nauka u Sarajevu i Filozofski fakultet (Odsjek jugoslavenskih književnosti i srpskohrvatskog/hrvatskosrpskog jezika kao i prvi stepen na Odsjeku za filozofiju i svjetsku književnost). Magistrirao je na Filozofskom fakultetu Sveučilišta u Zagrebu (Odsjek svjetske književnosti).

Doktorirao na Fakultetu islamskih nauka 1999. g. o temi «Stil kur'anskoga izraza». Dr. Latić je bio angažovan na predmetu Tefsir (komentar) Kur'ana: Klasične škole tefsira i Stilistika Kur'ana.

Zbog islamskih aktivnosti i političkih ideja komunistički režim ga uhapsio 1983.g. i u poznatom sarajevskom procesu protiv muslimanskih intelektualaca osudio na 6,5 godina zatvora. Oslobođen na intervenciju Međunarodnog PEN-centra 1986.g. Po izlasku iz zatvora bio zamjenik glavnog urednika «Preporoda», islamskih informativnih novina, a pokrenuo je i sedmične listove «Muslimanski glas» i «Ljiljan», čiji je glavni urednik bio od 1990. do 1994.g. Od 2000. do 2004. god. bio glavni i odgovorni urednik „Glasa islama“, magazina koji izlazi u Novom Pazaru (Sandžak). Bio je dugogodišnji politički saradnik predsjednika Stranke demokratske akcije i Predsjedništva Bosne i Hercegovine, rahm. Alije Izetbegovića, s kojim je pokrenuo Bošnjačku radioteleviziju. Član je Društva pisaca Bosne i Hercegovine i Svjetskog društva muslimanskih pisaca sa sjedištem u Rijadu.

Dobitnik je slijedećih književnih nagrada: Starješinstva Islamske zajednice u Republici Bosni i Hercegovini, Slova Gorčina u Stocu 1979.g, Trebinjskih večeri poezije 1980.g., Društva pisaca Bosne i Hercegovine 1991.g., studentske nagrade «Hasan Kikić» 1978., priznanja Gazi Husrevbegove medrese za afirmaciju ove škole i Islamske zajednice 2005., «Skender Kulenović» za poemu «Srebrenički inferno» 2006.; bošnjačke nacionalne nagrade za književnost „Hasan Kaimi-baba“, Zvornik, 2008.; Internacionalne nagrade „Istanbulensis“ na festivalu poezije, Istanbul, 2012.

Objavio je više djela te naučnih i stručnih radova iz oblasti tefsira. Detaljna biobibliografija dr. Džemala Latića dostupna je na sljedećem linku: [Bio-bibliografija](#).